

Hysbysiad Preifatrwydd – Ymarferion Ymgynghori Defra

Pwy sy'n casglu fy nata personol?

Y rheolwr data yw Adran yr Amgylchedd, Bwyd a Materion Gwledig (Defra). Gallwch gysylltu â Rheolwr Diogelu Data Defra drwy'r ebost yma: data.protection@defra.gov.uk

Dylai unrhyw gwestiynau am sut mae Defra'n defnyddio'ch data personol ac am eich hawliau perthynol gael eu hanfon at y cysylltwr uchod.

Gallwch gysylltu â'r Swyddog Diogelu Data, sy'n gyfrifol am fonitro a yw Defra yn bodloni gofynion y ddeddfwriaeth, drwy'r ebost yma:

DefraGroupDataProtectionOfficer@defra.gov.uk

Mae Defra'n defnyddio [Citizen Space](#) i redeg eu hymarferion ymgynghori. Mae Citizen Space yn cael ei ddarparu gan [Delib Ltd \(Delib\)](#). I gael gwybodaeth am Delib, gan gynnwys sut y byddan nhw'n defnyddio data personol, cliciwch ar y ddolen yma: https://www.delib.net/about_delib a chliciwch ar y dolenni i'w Hysbysiad Preifatrwydd ar waelod y tudalen.

Pam mae Defra'n defnyddio fy nata personol?

Mae Defra'n defnyddio'ch data personol pan fydd yn ymgynghori â chi ac yn cael eich sylwadau a'ch barn ar ddeddfwriaeth neu bolisi arfaethedig ynglŷn â phwnc rydych chi wedi nodi ei fod o ddiddordeb i chi. Efallai y bydd Defra'n cysylltu â chi'n uniongyrchol i roi eich sylwadau a'ch barn mewn ymateb i ymarfer ymgynghori neu efallai y byddwch chi'n penderfynu ymateb i ymarfer ymgynghori rydych chi wedi'i weld ar GOV.UK neu rywle arall.

Os byddwch yn ymateb i ymarfer ymgynghori, mae'n debyg y bydd eich data personol yn cynnwys eich enw a'ch manylion cysylltu a'r sylwadau a'r safbwyntiau y byddwch chi'n eu rhoi yn eich ateb. Bydd Defra'n defnyddio'ch data personol i gofnodi'ch sylwadau a'ch barn ac i gymryd eich ateb i ystyriaeth – gyda phob ateb arall cyn belled ag y bo modd – pan fydd penderfyniadau'n cael eu gwneud o ganlyniad i'r ymgynghoriad.

Mae Defra hefyd yn cael datgelu data personol wrth ymateb i geisiadau o dan y deddfau rhyddid gwybodaeth. Os hoffech roi gwybod i Defra yr hoffech i'r cyfan neu unrhyw ran o'ch ymateb i ymgynghoriad gael ei gadw'n gyfrinachol, dilynwch y weithdrefn a nodir yn yr adran 'Cyfrinachedd a gwybodaeth diogelu data' yn y llythyr sy'n cyd-fynd â'r ymgynghoriad. Fel y sonnir yn yr adran honno, bydd Defra'n cymryd eich sylwadau i ofyn am gyfrinachedd i ystyriaeth cyn belled ag y bo modd, ond does dim modd rhoi gwarant absoliwt o gyfrinachedd. Mae'r adran 'Cyfrinachedd a gwybodaeth diogelu data' yn y llythyr sy'n cyd-fynd â'r ymgynghoriad yn rhoi rhagor o fanylion am hyn.

Beth yw'r sail gyfreithiol yn y gyfraith diogelu data i Defra ddefnyddio fy nata personol?

Mae dwy sail gyfreithiol yn y gyfraith diogelu data sy'n gymwys wrth i Defra ddefnyddio'ch data personol ar gyfer ymarferion ymgynghori:

- (1) eich cydsyniad chi; a
- (2) bod angen defnyddio (neu brosesu) eich data personol er mwyn cyflawni tasg sy'n cael ei chyflawni er budd y cyhoedd.

Eich cydsyniad chi yw'r sail gyfreithiol gychwynnol ar gyfer defnyddio'ch data personol at ddibenion ymarferion ymgynghori. Os yw Defra wedi cysylltu â chi'n uniongyrchol i roi gwybod i chi am ymarfer ymgynghori, y rheswm am hynny yw eich bod wedi rhoi gwybod i Defra o'r blaen yr hoffech gael cysylltiadau ynglŷn â phwnc yr ymgynghoriad. P'un a gawsoch chi ymarfer ymgynghori yn uniongyrchol oddi wrth Defra neu mewn unrhyw ffordd arall, os byddwch yn ymateb i ymarfer ymgynghori, byddwch yn gwneud hynny'n rhydd ac o'ch gwirfodd, a hynny ar ôl cael y cyfle i gael yr wybodaeth lawn o'r dogfennau ymgynghori.

Os byddwch yn ymateb i ymarfer ymgynghori, y sail gyfreithiol i Defra ddefnyddio'ch data personol yn eich ateb yw bod angen ei ddefnyddio er mwyn cyflawni tasg sy'n cael ei chyflawni er budd y cyhoedd. Y dasg berthnasol er budd y cyhoedd yw yr ymgynghorir â phobl a sefydliadau, yn enwedig y rhai y mae deddfwriaeth neu bolisi arfaethedig yn debygol o effeithio arnynt, ynglŷn â'r cynigion a'u bod yn cael cyfle i roi eu barn a'u sylwadau. Bydd Defra'n ystyried safbwyntiau a sylwadau sy'n dod i law mewn ymateb i ymgynghoriad cyn gwneud penderfyniadau terfynol.

Os bydd Defra'n datgelu data personol wrth ymateb i gais o dan y deddfau rhyddid gwybodaeth, y sail gyfreithiol yw bod angen i Defra ddefnyddio'ch data personol er mwyn cyflawni tasg sy'n cael ei chyflawni er budd y cyhoedd. Y dasg berthnasol er budd y cyhoedd yw bod rhaid i Defra gydymffurfio â'i rwymedigaethau o dan y deddfau rhyddid gwybodaeth.

Gyda phwy y bydd fy nata personol yn cael ei rannu?

Bydd Defra'n cyhoeddi crynodeb o'r ymatebion; fydd hyn ddim yn cynnwys unrhyw ddata personol.

O fewn Defra, bydd eich data personol a'r data sy'n eich adnabod ar gael i dimau sy'n gweithio ar yr ymgynghoriad. Byddai'r rhain yn cynnwys y canlynol: y tîm polisi a enwir yn y dogfennau ymgynghori, y Cydgysylltydd Ymgynghori a'r tîm sy'n dadansoddi'r ymatebion i'r ymgynghoriad. Ar adegau, bydd Defra'n defnyddio contractwyr allanol i'w dadansoddi, a phan fo hyn yn wir, bydd hyn yn cael ei nodi'n glir yn y ddogfen ymgynghori. Bydd unrhyw contractwr allanol yn dod o dan bolisi Defra ar ddiogelu data.

Fel darparwyr Citizen Space, bydd gan Delib hefyd fynediad at eich data personol. I gael manylion am sut mae Delib yn defnyddio'ch data personol, gweler eu [Hysbysiad Preifatrwydd](#) nhw.

Fydd fy nata personol i'n mynd y tu allan i'r Deyrnas Unedig?

Bydd. Os byddwch yn anfon neu'n derbyn negeseuon ebost drwy wefan Citizen Space, gan gynnwys pan fyddwch yn defnyddio'r ffurflen 'Help/feedback', fe gaiff y rhain eu prosesu yn yr UE. Bydd unrhyw ddata personol yn y negeseuon ebost hyn yn dod o dan GDPR y DU a'r UE, sy'n diogelu'ch hawliau mewn perthynas â'ch data personol.

Mae ymatebion i gwestiynau mewn ymarferion ymgynghori yn cael eu cadw yn y Deyrnas Unedig. Felly, os byddwch yn ymateb i ymarfer ymgynghori, ni fydd dim data personol a ddarperir gennych yn yr ymateb hwnnw yn cael ei ddefnyddio gan Defra na Delib y tu allan i'r Deyrnas Unedig.

Os ydych chi'n dibynnu ar fy nghydsyniad i ddefnyddio fy nata personol, ga i dynnu fy nghydsyniad yn ôl?

Mae gennych chi hawl i dynnu'ch cydsyniad yn ôl unrhyw bryd drwy ddefnyddio manylion cysylltu Defra sy'n cael eu rhoi yn y dogfennau ar gyfer unrhyw ymarfer ymgynghori penodol. Os byddwch yn tynnu'ch cydsyniad yn ôl, efallai y bydd Defra yn gallu parhau i ddefnyddio unrhyw ddata personol y maen nhw wedi'i gael eisoes hyd at yr amser hwnnw at ddibenion ymgynghoriadau rydych chi wedi ymateb iddyn nhw, yn enwedig os yw'ch ateb eisoes wedi'i gynnwys wrth ystyried y cynigion sydd dan sylw yn yr ymgynghoriad.

Os byddaf yn ymateb i ymarfer ymgynghori, pa mor hir y bydd fy nata personol yn cael ei gadw?

Bydd Defra'n cadw'ch data personol am hyd at ddwy flynedd ar ôl diwedd y cyfnod ymgynghori.

Beth yw'r canlyniadau imi os na fyddaf yn darparu fy nata personol neu'n caniatáu iddo gael ei ddefnyddio at ddibenion ymgynghoriadau?

O'ch gwirfodd rydych chi'n cymryd rhan mewn ymarferion ymgynghori ac ni fydd unrhyw ganlyniadau i chi os byddwch yn dewis peidio ag ymateb i ymgynghoriad neu os byddwch yn tynnu'ch ateb yn ôl unrhyw bryd.

Beth yw fy hawliau i?

Mae rhestr o'ch hawliau o dan y deddfau diogelu data ar gael yma:

<https://ico.org.uk/for-organisations/guide-to-the-general-data-protection-regulation-gdpr/individual-rights/>

Sut mae cwyno?

Mae gennych chi hawl i gyflwyno cwyn ynglŷn â defnyddio'ch data personol unrhyw bryd i Swyddfa'r Comisiynydd Gwybodaeth (ICO – yr awdurdod sy'n goruchwyllo diogelwch data). Os hoffech arfer yr hawl honno, mae'r manylion llawn ar gael yma:

<https://ico.org.uk/make-a-complaint/>

Siarter Gwybodaeth Bersonol Defra

Gweler hefyd Siarter Gwybodaeth Bersonol Defra, sydd ar gael drwy ddilyn y ddolen ganlynol ac sy'n nodi'n fras sut mae Defra'n prosesu data personol:

<https://www.gov.uk/government/organisations/department-for-environment-food-rural-affairs/about/personal-information-charter>.